

Et bossien *Schierterd*

Naost de bos van Boshoeve in Ni'jberkoop ligt even ten westen daarvan, vlakbi'j De Lende, nog altied een hiel klein hoekien bos. Dat bossien is et laeste van meerdere kleinere bossies, die eertieds in die omgeving legen hebben. Tussen die bossies en De Lende laggen de hujlanen van de boerderi'jen die noordeliker stonnen. Et bossien daor et now omme gaot is dus al hiel oold, en dat weten we o.m. deurdat et op oolde kaorten te vienen is.

Et bossien het de opmarkelike veldnaeme *Schierterd*. Ok al is wel es aanders verteld, die naeme beston in elk geval al sund et begin van de veurige ieuw, en vermoedelik al (veul) eerder. Waor de naeme percies votkomt is niet mit zekerhied te stellen, mar an te nemen is dat et mit de grootte van et bossien te maeken.

'Schierterd' of 'schietertien' is een anduding veur wat kleins, bi'jglieks een klein kiend of klein dier. En een klein hoekien grond wodt ok wel es een 'schiethoekien' nuumd: 'Dat huus wat te koop staot is beslist mooi, mar d'r zit mar een schiethoekien grond bi'j'. Et liekt daoromme annemelik dat om die reden de naeme veur dit stokkien bos zo ooit ontstaon is. De ere verklaoring die wel es nuumd is, is de volgende. Doe in de vuuftiger jaoren veul grond naost Boshoevebos anmaekt wodde, zollen de arbeiders, as ze heur behoefte doen mossen, mit naeme in 'Schierterd' uut de broek gaon. Dat zal wis en zeker ok wel es gebeurd wezen... Mar de naeme veur et bossien beston doe liekewel al lange.



Kaortien van de situaosie in 1922. Rechts onder de letter F ziej' et diel van Schierterd zoas dat nog altied bestaot.



Doe ik indertied over 'Schierterd' in de Stellingwarver kraanten vertelde, kwam kot daarop een arg aorige reaktie binnen van de heer Koert de Boer van Tronde. De Boer was doe al een aentien in de tachtig; an et begin van dit jaor raekte hi'j spietig genoeg uut de tied. De Boer vertelde me indertied dat hi'j de naeme ok al van zien kienderjaoren of kende. Et meest opmarkelike was liekewel dat De Boer de naeme kende van een hoekien laand an de ére kaante van De Lende! Zo hadde zien heit indertied twie percelen laand had an de zuudkaante van De Lende, dus an de Elsiger kaante. Et iene perceel wodde *Schierterd* nuumd en lag naost een hoekien bos. Et lag wat hoger en was wat bulterig en heide-achtig. Et ere perceel, dat hujlaand was en dat leger lag, wodde de Builiger maoden nuumd. Dat laand leup deur tot an et ziedreviertien De Riete daor in De Lende uitkomt. Deur de reaktie van De Boer weten we dus now dat de veldnaeme *Schierterd* an weerskaanten van De Lende veurkomt én in beide gevallen al herwertsjaoren oold is!

Op 'e foto's van een peer jaor leden is links van Schierterd et oolde hujlaand te zien, links daor weer van stroomt De Lende. In de veerte liggen de bossen van de buurtschop Boekelte. Rechts is te zien dat d'r een stokkien van et bossien vothaeld is. Misschien om wat makkeliker van et iene stok laand in et ere te kommen, wie zal et zeggen. Et is vanzels te hopen dat et hierbi'j blieven zal en dat Schierterd nog in lengte van jaoren veur et laandschop beholen blijft. (Tekst en foto's: Sietske Bloemhoff)